



**JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIÁL**

*Komunikadu Imprensa  
04 Juñu 2013*

**Tribunál Distritál Dili kondena arguidu tinan 3 prizaun maibé suspende pena tinan 4 ba krime maus-tratus ba kónjuje**

Iha 28 Maiu 2013, tribunál distritál Dili lee akordaun ba kazu maus-tratus ba konjuje. Kazu ne'e envolve arguidu EV pratika krime hasoru lezada YD. Kazu ne'e akontese iha Distritu Dili.

Ministériu Públiku akuza katak iha April 2011, maisumenus tuku 15:00 loraik, arguidu baku, buti iha kakorok, tuku, no rasta lezada nia fuk. Arguidu kontinua halo agresaun hanesan baku lezada nia ulun ho butir no basa dala rua iha hasan iha loraun 4 Novembru 2011 mais ou menus tuku 09:00 dadeer. Agresaun ne'e kauza lezada sente moras maibé laiha bubu no konsege ba halo tratamentu iha ospital. Motivu husi akontesimentu tanba arguidu diskunfia no hare lezada sae motor ho mane seluk.

*JSMP preokupa ho pena ne'ebé tribunál hamonu ba arguidu ho suspensaun da pena ba kazu maus-tratus ba kónjuje, tanba seidak iha monitorizasaun efetiva ba arguidu nia hahalok durante tinan 4 suspensaun pena, dehan Luis de Oliveira Sampaio Diretór Ezekutivu JSMP.*

Tribunál konsidera faktus provadu sira katak iha duni aktu maus-tratus akontese duni hanesan mensiona iha leten. Ministériu Públiku akuza arguidu nu'udar autór material ba krime ida ne'e ho artigu 154º husi Kódigu Penál konjuga ho artigu 35º alinea b husi Lei Kontra Violénsia Doméstika.

Kazu ne'e rejista iha tribunál ho Númeru Prosesu: 224/2012/TDD. Audiénsia julgamentu prezide husi juis kolektivu Dr. Julio Gantes, Dr. Antoninho Gonçalves no Dr. Duarte Tilman Soares. Ministériu Públiku representa husi Dr. Renato Bere Nahak no arguidu hetan defeza husi Dra. Olga Barreto Nunes husi Eskretorio Defensorio Públiku.

Atu hetan informasaun kle'an, favor kontaktu:

Luis de Oliveira Sampaio

Diretór ezekutivu JSMP

Email: [luis@jsmp.minihub.org](mailto:luis@jsmp.minihub.org)

Landline: +670 3323883

[www.jsmp.tl](http://www.jsmp.tl)